

# Ze barri?

ESKORIATZA / Egubakoitza / 2006ko urtarrilaren 20a / 240. zenbakia

KOORDINATZAILEA: Iker Barandiaran • Otolora 31 ARRASATE 20500 • Tel.: 943 71 25 11 • Faxa: 943 71 23 89 • Posta elektronikoa: zebarrri@goiena.com • Lege gordailua: SS200/99

## Lehengo Museo Eskolan jarri dute Musika Eskolaren behin betiko egoitza

IKER BARANDIARAN

Azkeneko bost ikasturteotan, Musika Eskola Luis Ezeiza eskolaren ondoko oktogonoetan egon da. Eta Udalak oktogonoetan haurtzaindegia egitea erabaki zuenez, lehengo Museo Eskolaren lokala egokitu eta haraxe eraman dute Musika Eskola.

Joan den maiatzean hasi ziren Museo Eskolaren lokala zena egokitzeko lanak. Horren aurretik, Musika Eskolako zuzendari Araceli Telletxeak euren premiak azaldu eta egoitza berria diseinatzen lagundu zuen.

Lanak abendura arte iraun zuten, eta urtarrilaren 9an ikasleek egoitza berria jaso zituzten eskolak. "Udalak presa zuen haurtzaindegiko lanak hasteko eta oktogonoetatik lehenbailehen irtetea komeni zitzaion. Azkenean, Gabonetako oporraldiekin batera lekualdaketa egin genuen, eta eskolek ez dute etenaldirik izan", azaldu zigun eskolako zuzendari Araceli Telletxeak.

### INTSONORIZAZIO APROPOSA

Araceli Telletxeak azaldu zigun egoitza berria oktogonoetako lokalean baino ikasgela bat gehiago dutela; 11 gela guztira. 8 gela



Argazkian, Musika Eskolako irakasleetako batzuk eta zuzendaria. Giro ona dute lantaldean.

instrumentuetarako; 2, musika hizkuntzarako; eta 1, Musika Bandak erabiltzen duena, hain zuzen ere. Horrez gain, zuzendaria oso pozik dago eskolan jarri duten intsonorizazioarekin. "Musikene eskolan duten sistema bera erabili dute, eta oso egokia da",

Oraindik ez dute inaugurazio ofizialik egin, xehetasun batzuk

bukatzea falta zaielako, baina badute asmoa behin lan guztiak bukatuta halako ekitaldi edo ospakizunen bat egiteko.

### ESKOLA GEHIENAK ARRATSALDEZ

Musika Eskola 15:30ean zabalitzen dute. Hala ere, goiz batzuetan irakasleek eskolak ematen dizkiete heldu batzuei. Gaur egun

eskolan 240 bat ikasle daude, eta horietatik 60tik gora dantzariak dabilta. Horiek, dantzariak, pilotalekuaren azpiko lokal baten batzen dira. Gainontzeko ikasleek eskolan ikasten dute.

Hala ere, lehengo eta oraingo eskolek duten gabezia bat da "emanaldietarako areto egokirik ez izatea. Pena da, baina

*Gabonetako oporrak baliatu zituzten lekualdaketa egin eta etenaldirik ez eragiteko*

*Lekuz aldatu dute Musika Etxea, oktogonoetan haurtzaindegia egingo dutelako*

aspaldi honetan Ibarraundiko aretoa erabiltzen dugu, eta txikia den arren, akustika oso egokia dauka. Bada zerbait".

Eskolako plaza guztiak beteta daude, eta hainbat lagun itxaroten daude. "Eskolak harrera ona dauka, eta ikasle eta gurasoak gustura daude!".

Bestalde, gaur, egubakoitza, Musika Bandak Donostiako dantborradan esku hartuko du zailtasunak dituen talde batekin, azkeneko urteetan egin ohi duen moduan.

## Marin, Zarimutz eta Mazmelako lagunek telebista seinalea jaso eta Internet ibiltzeko errepikagailua jartzen dabilta

I.B.

Eskoriatzako hainbat elizatek ez da telebista seinalea ondo heltzen. Arazo handiena dutenak Marin, Zarimutz eta Mazmelako bizilagunak dira. Hori konpontzeko errepikagailua jartzeko lanak hasi dituzte.

Udalak aspalditik daki hainbat elizateetan telebista ondo ikusteko kableatu pribatu edo kolektiboak egin behar izan dituztela. Hala, Udalak konponbidea eman

gura izan dio arazo horri, eta Telecom Novatecno enpresari adjudikatu dizkio lan horiek.

Horren arabera, enpresa horrek hondeaketa egin, korrantea eraman eta instalazioa jarri beharko du. Horretarako, 75.000 euroko aurrekontua dauka.

### ERREPIKAGAILUA AITXORROTX ALDEAN

Udalak jakinarazi digunez, errepikagailua Leintz Gatzagatik Zarimutz aldera jarriko dute, Atxorrotx menditik gertu; hain zuzen ere, Gorosarri baserriaren

gainetik. Udaleko ordezkarien esanetan, leku oso aproposa da. "Handik ikuspegi ona dago seinalea hartzeko, eta elizateetara bidaltzeko. Berez seinalea Oiz menditik hartuko dugu".

Lanak Eskoriatzan egingo dituzte eta Eskoriatzako Udalak eramango dituen arren, argindarra Leintz Gatzagako Artabilla baserriatik hartuko dute, hori da eta gertuen aurkitu duten aukera.

Lanok urtarrilean hasi zituzten eta Udalaren asmoa da bi

hilabete barru, martxo aldera, bukatuta egotea.

Horrez gain, jakinarazi dute telebista seinalea emateaz gain, Udalak enpresa horri eskatu

*Helburu nagusia da telebista emisioa lortzea, baina wi-fi sistema ere egokituko dute*

diola banda zabala ere abiarazteko. Horren bitartez, hiru elizateetan bizi diren lagunek internet erabiltzeko aukera ere izan dezaten.

*Udalaren asmoa da martxo aldera errepikagailua jarrita eta indarrean egotea*



**TELEFONOJAKINGARRIAK**

**ESKORIATZA**

Udaletxea	943 71 44 07
Udal bulegoak	943 71 45 32
Udaltzaingoa	943 71 44 07
Euskaltegia	943 79 21 68
Kultura etxea	943 71 46 88
Gizarte laguntzailea	943 71 31 36
Kirol etxea	943 71 53 28
Liburutegia	943 71 31 35
Luis Ezeiza	943 71 53 56
Jose Arana Almen Ikastola	943 71 44 86
Almen	943 71 49 07
Museo Eskola	943 71 54 53
Astroki	943 71 40 77
HUHEZI	943 71 41 57
Osakidetza	943 71 44 52
Telesko	943 71 49 17
Taxiak	943 71 40 59

**BESTELAKOAK**

Eskualde ospitalea (Arrasate)	943 00 53 00
Gurutze Gorria (Bergara)	943 76 55 76
Erantzaintza (Arrasate)	943 79 71 99
Suhiltzaileak (Oñati)	943 79 28-00
Renfe (Zumarraga)	943 72 15 15
Renfe (Gasteiz)	945 23 20 30
PESA (Arrasate)	902 10 12 10
Larrialdia (Arrasate)	943 77 10 43
SOS Deiak	112

**OHARRAK**

**BIHAR, ZAPATUA, ARETO FUTBOLA KIROLDEGIAN**  
Ohorezko Ligako taldeak zapatuan izango du nor-gehiagoka AD Guingangoloren kontra. 1. mailako taldeak ere egun berean jokatuko du. 16:00etan, San Pedro Kenciren kontra lehiatuko da. Gazteen taldeak, berriz, Adiazabal izango du aurkari, 11:00etan.

**BIHAR, ZAPATUA, SASKIBALOI TALDEEN PARTIDUAK**  
2. mailako taldeak Dosa Salesianos izango du aurkari, 18:00etan; junior taldeak Carnicas San Marcialen kontra jokatuko du, 16:00etan; eta kadeteek STL Lazkao Txiki izango dute aurkari, 11:15ean.

**HILAREN 22AN UMEENDAKO FILMA EMANGO DUTE**  
Etzi, domeka, *Annaluise eta Anton* filma emango dute Ibarraundi museoa. 17:30ean izango da eta euro bat ordaindu beharko da. Emanaldi guztiak euskaraz egiten dituzte.

**'MIHILUZE' LEHIAKETAN ESKU HARTZEKO DEIALDIA**  
ETBk *Mihiluze* lehiaketa abiarazi du. Hizkuntza jolasak eta umorea ardatz izango ditu lehiaketa horrek, eta Kike Amonarrirek aurkeztuko du. Udaleko Euskara Sailak bat egin du asmo horrekin eta ahalegina egiten dabil Eskoriatzan hirukote bat osatzeko. 18 urtetik gorakoak behar dituzte, umoretsuak eta berritsuak. Interesatuak jo dezatela Udaleko Euskara Sailera edo dei dezatela ETBra, 943 01 17 84 telefono zenbakira.

# Antoni Martinezek irabazi du dendarien Gabonetako zozketa

DEIANE ARRIETA/IKER BARANDIARAN

**Dendarien Gabonetako saria Antoni Martinez eskoriatzarrak irabazi du. Martitzenean eman zioten saria Pagaldai harategian. Artikulu hau irakurri orduko, Martinezek gastatuta izan beharko ditu 1.500 euroak. Afari ederra egitekoan egongo da, bada.**



Argazkian, Antoni Martinez eta Pagaldai harategiko arduraduna.

Aurtengoa da bigarren aldia merkatariek Gabonetan kanpaina abiarazten dutena. Gabon aurreko egunetatik Errege osterara arte bezeroei hainbat txartel banatu zizkieten. Orain zozketa egin dute eta irabazleari sari txukuna eman diote: hiru egunetan herriko saltokietan gastatu beharreko 1.500 euro, eta bi lagunendako afaria. Antoni Martinezek Pagaldai harategian hartu zuen txartel sariduna, eta astelehenean jakin zuen irabazlea bera zela. Martinezek GOITBri esan zion errez izango zuela diru kopuru hori hiru egunetan gastatzea.

"Batez ere familiarendako arropa erosiko dut, eta gero beste gauzatzu batzuk". Horrez gain, gura duen lagunarekin afari goxo bat egiteko aukera ere izango du. Bigarren aldia da herriko mer-

katariek Gabonetan halako kanpaina abiarazten dutena. Aurtent, gainera, 500 euro gehiago batu dizkiote sariari. Datorren urtean kanpainari berrikuntzak egin gura dizkiote.

# Marin, Zarimutz eta Mazmelako auzotarrek, alegazioa AHTri

i.B.

**AHTren lanak direla eta, Marin, Zarimutz eta Mazmelako auzotarrak eta Udala oso arduratuta daude Espainiako Sustapen Ministerioak lurrak desjabetzeko prozedura egiten dabilen moduarengatik. Biek prozedura hori atzeratzea eskatu diote Ministerioari.**

Joan den astean jakinarazi genuen Espainiako Sustapen Ministerioak AHT egiteko lur desjabetzeak egingo zituela. Kaltetutako auzotarrek Espainiako Buletinean izan zuten horren berri, Ministerioa ez zen-eta euren gaitan zuzendu. Hala, joan den zapatuan bukatu zen alegazioak aurkezteko epea, eta ez Udalak ezta

auzotarrek ez zuten horretarako denbora nahikorik izan. Udalarri dagokionez, joan den astean jakinarazi zigun Sustapen Ministerioari eskatu diola desjabetzearen prozedura atzeratzeko. Udalaren esanetan, hori eskatzeko arrazoia da "Udalak benetako proiektua jaso ez duela, desjabetze aktak akatsak dituela eta Ministerioak gauzak ez dituela ondo egin".

**AUZOTARREK, AHO BATEZ**  
Buletinean argitaratu duten informazio urriaren arabera, AHTk hiru elizateotako auzotarrak kaltetuko ditu: Maringoak, Zarimuzkoak eta Mazmelakoak. Horren arabera, elizate horietako 18 laguni lurrak desjabetu-

ko dizkiote. Horregatik, joan den astean batzarra egin zuten alegazio bateratua aurkezteko, eta hiru elizateotako bizilagun guztiak sinatu zuten alegazio hori, "guztiok garelako kaltetuak". Ministerioari eskatu diote alegazio epea atzeratzeko eta informazio gehiago bidaltzeko. "Udaletxera jo genuen informazio eske, baina informazio hain urriarekin ezin dugu ganorazko alegaziorik egin". Horregatik, Ministerioari honako hau eskatu diote: proiektua eskala handiagoan bidaltzeko, ingurumen azterketarekin, neurri zuzentzaileekin eta neurri konpentsatzaileekin, azken horiek egongo balira. Horrez gain, Espainiako Ingurumen Sailera jotzeko asmoa dute.

**LABUR**

## Gurasoek oinarritzko euskara ikasteko ikastaroa

Udaleko Euskara Sailak eta herriko hiru ikastetxeek *Euskara ikasten seme-alaben bide-lagun* ikastaroa abiaraziko dute. Ikastaroa 20 ordukoa izango da, eta martitzen eta egunetan egingo dute otsaila eta martxoa. Kultura etxean emanango dute, 14:30etik 16:00etara. Bestek beste, abestiak, jolasak, zenbakiak eta beste erakutsiko dizkiete HH eta LHko 4. maila arteko ikasle-en gurasoei. Hilaren 27a aurretik eman behar da izena, ikastetxeetan.

## Hainbat erakusketa egingo dituzte Ibarraundin

Ibarraundi museoko arduradunek jakinarazi digute otsailera hainbat erakusketa prestatzen dabiltzala. Bateatik, Lorentxo Altube arrasa-tearraren bilduma hilaren 2tik 16ra bitartera jarriko dute ikusgai. Baserrietako erremintak eta musika tresnak, besteak beste. Horrez gain, otsaileko azkeneko astean kontsumoaren gaineko erakusketa jarriko dute. Arropen, oinetako eta elikagaien etiketen gainekoa izango da.

## Haurtzaindegia egiteko lanak hasi berri dituzte

Astean hasi dituzte partzuegoko haurtzaindegia egiteko lanak. Luis Ezeiza eskolaren ondoko oktogonoetan egingo dute 0 eta 3 urte bitarteko umeei zuzendutako zerbitzu berri hori. Lan horiek 295.900 euroko aurrekontua dute, eta Aralan enpresak egingo ditu. Bestalde, haurtzaindegia kanpaina beste lan batzuk egingo dituzte: aterpea konpondu, patioa itxi... Baina horrek beste aurrekontu bat izango du.

**FAGOR**

Fagor Ederlan

Fagor Ederlan, S. Coop.

Torrebaso 7  
20540 Eskoriatza  
Gipuzkoa  
SPAIN  
Tel: +34 943 719 000  
Fax: +34 943 719 001

**MONDRAKON**  
CORPORACION ECONOMICA